

बुन्गला देखी थारी अजब बहार, ज्या में निराकार दीदार ।
काया बुन्गला में पातर नाचे, देख रहयो संसार ।
किताक पगड़ी ले चल्या रे, कई गया जमारो हार ॥ १ ॥

काया बंगले में बिणजी बिणजे, बिणजे जिनसे अपार ।
हरिजन हो सो हीरा बिणजे, पात्थर या संसार ॥ २ ॥

काया बंगले में दौड़ा दौड़े, दौड़ रहया दिनरात ।
पांच पच्चीस मिल्या पाखरिया, लूट लियो बाज़ार ॥ ३ ॥

काय बंगले में तपसी तापे, अधर सिंहासन ढाल ।
हाड मांस से न्यारो खेले, खेले खेल अपार ॥ ४ ॥

काया बुन्गले में चोपड़ मांडी, खेले खेलण हार ।
अबके बाजी मंडी चोवठे, जीत चलो चाहे हार ॥ ५ ॥

नाथ गुलाब मिल्या गुरु पूरा, जड़ पाया दीदार ।
भानिनाथ शरण सतगुरु की, हर भज उतारो पार ॥ ६ ॥

जय श्री नाथजी की